

Ess iss schwer was los

Omm letzde Sunndaachowend hott mich moin ahle Kummbeer Hubert oogerufe. Josses naa, Hubert, habb isch gesaad, dass merr von dir mol widder ebbes heern dut. Wassen los medder, weilde dich gar nimmi melde dust?

Lieber Hannes, hott doodruffhie de Hubert gesaad, du könntest ja auch mal anrufen.

No ja, habb isch ze Ontwort gewwe, hädd isch mache kenne. Awwer bei mir iss halt allsfort schwer was los.

Ich weiß, hott doo de Hubert gesaad, aber trotzdem, ich würde mich freuen von Dir zu hören. Aber nun der Grund meines Anrufes: Ich werde am neunten September nach Flörsheim kommen und ...

Isch habben unnerbroche: Konnsde widder meddem Audo fahrn, Hubert, isch moon weesche doine Aache?

Nein, seet de Hubert, ich werde mit dem Zug kommen. Mein Auto habe ich verkauft.

Dess scheene Audo, habb isch gesaad, hoffentlich hosde noch ebbes deferr kriecht.

De Hubert war e bissi traurisch. Es geht, es war ein Diesel und du kennst ja die Diskussionen, na ja.

Hosde eischendlich ebbes Bestimmtes vor?, habb isch gefroochd, weilde nooch Flerschem kimmst?

Ja, seet de Hubert, ich möchte gerne den Tag der offenen Tür nutzen und mir das neue Rathaus ansehen. Und ...

Isch habben unnerbroche: Unn vumm Rothaus kimmsde grad in die Kapell, weil mir onn dem Daach aach die Muddergottes, die merr hawwe schnitze losse, dort ausstelle.

Seet de Hubert: So? Die Statue schau ich mir natürlich an. Aber außerdem will ich um Drei zu Dir in die Kulturscheune kommen zum Mundartnachmittag. Wie ist das denn damit?

Isch gebb ze Ontwort: Mir wolle zeische, dass die Mundart lewe dut unn dasses immer mieh Leit gibt, die sich meddere befasse. Doodeferr hawwe merr vier Auswärrdische oigelade unn die dun mett Vordrääsch odder Gedichte odder egal was ihr Sprooch vorstelle. De Sinn vunn dem Gonse iss, dass merr emol heert, dasses noch onnern Mundarte außer Flerschemerisch gewwe dut und dass mir moone, egal wo de bist unn babbelsd, dass ess wert iss, die Mundart unn ihr Ausdrigg uffzehewe unn weiterzegewwe.

De Hubert druff: Hört sich gut an. Wer kommt denn da alles in die Scheune?

Isch saach: Doo kimmt e Fraa aus Massenem, e onner aus Eltville, enn Monn aus de Geeschend vunn Limborsch unn zwaa Männer aus de Wetterau, unn all zesomme wolle merr, dasses enn scheene Noochmiddaach gewwe dut. Nooch ooner Stund odder e bissi mieh duts e Paus gewwe unn doodenooch kann merr noch mett dene Leit vunn auswärts redde und kann frooche, was in ihrne Heimat su ferr die Mundart gemacht werdd.

Da bin ich wirklich gespannt, seet de Hubert, das wird sicher sehr interessant. Aber sag mal, was gibt's denn da so alles?

Isch habb ins Telefon gegrinst. Liewer Hubert, was bissde su neigierisch. Awwer weil dus bist: Es dut Limboijer Hondkäs gewwe unn der werdd vunnere Limboijer Marktfrac in de Scheier oogeboode, awwer gell, nix verroode!

Eiern Honnes